

# De Stammholler

VAN HANNE PFAFF UT  
NEGENMEERTEN

As Enno geboren wurr, weer sien Moder Jantje al wat oller. 20 Jahr weer se al verheiraadt . Nu harr dat doch noch klappt mit de Stammholler. De Jung wurr verwentt van vörn un achtern, un alls dreihde

sük um hum. Twee Jahr later kreeg he denn noch en Süster, Antje. De leep so nebenbi mit. Enno keem immer an 't eerste Stee. Wenn dat in d` School Schandaal geev, meesttieds gung dat van Enno ut, denn stunn Moder hum bi un Antje



JOHANNE  
PFAFF

kreeg to hören: „Du musst beter uppassen up dien Bröör.“ „Aber he hett doch anfangen!“, see Antje denn. Moder aber bleev bi hör Menen, dat hör Jung provoziert wurren weer. Hum truff keen Schuld, un se betüeterde hum wiederhen.

Mit de Tied wurr Enno so `n richtigen Dwingelant. He harr de ganze Familie unner Kuratell. As Enno denn glückelk mit de School klaar weer, keem he in d` Lehr bi en Diskler. He harr aber keen Lüst, Lehrjung to wesen, un na een Week smheet de Meister

hum rut. Bi de nächste Lehrsteden weer dat ok nich anders. Enno harr eenfach keen Lüst sük unnertoörnen.

Do lehrde he en Wicht kennen, Selma, un verleevede sük in hör. Se weer en flietig Wicht un arbeidde in d` Kinnergaarn. Enno dreev sük wat herum un harr immer noch keen Lehrstee. Dat passde Selma nich un se schull hum ut. „So word dat nix mit uns. Du musst ok arbeiten, wo wullt du denn en Familie satt kriegen, wenn du blot herumswojen deist?“

As Jantje Selma kennenleeren dee, wull se Enno dat Wicht utreden. „De is nix för di, de will di blot befehlen un alls to seggen hebben! Buten-

deem hett se keen Vater, de is nämlich afhauen as Selma geboren wurr.“ Nu wurr Enno aber düll in d` Kopp. „Waarum seggst du sowat, daar kann Selma doch nix för. Un se is en feitig Wicht, ok hör Moder is würkel en netten Froo. De arbeidt ok, wields du immer in Huus herumsitten deist.“

Dat geev Jantje nu doch to denken un se see nich weer wat tegen Selma, nee, de beid harren mit de Tied sogaar Fründskupp mitnanner. Un dat Beste weer: Enno fung nochmal bi sien eerste Meister an. Mennigmaal full hum dat noch stuur, wenn he sük wat seggen laten muss. Aber he hett dörhollen . Dank Selma.